

每週經課朗誦經文(巴克禮台語漢字)2015/08/30

共同經課 - 1 雅歌二章八節~十三節

8 啊！我所戀愛者的聲看啊；伊來啦！越佇山裡跳佇嶺裡。9 我所戀愛者親像羚羊，抑是鹿仔。看啊，伊倚佇阮的牆壁後，對窗仔啲看，對窗仔子啲探。10 我所戀愛者出聲對我講：我所疼者，我的美人，起來，及我相及去！11 看啊，因為冬天已經過，雨已經晴息啦！12 遍地的花已經開，鳥仔哮的時到啦；佇咱的境內聽見鳩雛的聲。13 無花果樹的果子漸漸成熟；葡萄樹開花吐出伊的芳。我所疼者，我的美人，起來，及我相及去！

共同經課 - 2 詩篇四十五篇一節~二節、六節~九節

1 [可拉後裔教示的詩，閣是愛慕的歌，交互樂官，調是用百合花。] 我的心湊出好的話；我講起我為著王所做的，我的舌是敏捷的人的筆。2 你比世間人卡好看；佇你的嘴滿滿有恩惠；所以上帝賜福你，直到永遠。6 上帝啊，你的寶座是永永遠遠的；你的國的權柄是正直的權柄。7 你歡喜公義，怨恨不法；所以上帝——你的上帝——用歡喜的油抹你，贏過你諸個同伴。8 你的衣裳攏有沒藥、沈香、肉桂的芳；對象牙的王宮有絲弦的樂器互你歡喜。9 有王的查某子佇你尊貴婦女的中間；王后用俄斐的金妝飾倚佇你的正旁。

共同經課 - 3 雅各書一章十七節~二十七節

17 見若好的賞賜及完全的恩賜攏是對頂面，對眾項光的父落來；伊無變換，也無轉鬚的影。18 伊照家己的意思，曾用真理的道生咱，欲互咱佇伊所造者的中間做親像頭水的果子。19 我所疼的兄弟啊，恁知此個。若是逐人論到聽著緊，講話著慢，受氣也著慢，20 因為人的受氣無成上帝的義。21 所以，恁除去攏總腌臢及過額的惡毒，著用溫柔來接納所種佇內面的道理，就是會救恁的靈魂的。22 恁著做行道理的，毋是干單聽的，來家己騙。23 因為聽道理若無行的，譬喻親像人佇鏡裡詳細看伊本然的面，24 看過了，就做伊去，連鞭袂記得伊生做甚麼款。25 若是人注神佇彼個齊全的律法，就是互人自由的，也長長住佇彼個，毋是聽了袂記得的，是實在啲用工的，此號人佇伊的所做欲有福氣。26 若有人掠家己做敬虔，也無約束伊的舌，就是騙伊家己的心，此號人的敬虔是空空。27 獨獨眷顧孤兒寡婦佇 in 的患難中，閣家己守，無互世俗染著，這佇父上帝的面前，就是做清氣無坵的敬虔。

共同經課 - 4 馬可福音七章一節~八節、十四節~十五節、二十一節~二十三節

1 有法利賽人及幾若個經學士聚集就近耶穌，in 是對耶路撒冷來。2 也曾看見伊的學生中有的用俗手啲食，就是未有洗的手。(3 因為法利賽人及眾猶太人攏是拘執古早人的流傳，若無出力洗伊的手就無食；4 對街市倒來，若無洗也無食；in 所受來執守的猶有多項，親像洗杯、罐、銅器許個。) 5 法利賽人及經學士問伊講：「你的學生無照古早人的流傳來行，用俗手來食是怎樣？」6 伊給 in 講：「以賽亞所識語指恁假好的人真正著。照所記載講：此個百姓用嘴唇尊敬我，若是 in 的心離開我遠遠。7 in 敬拜我是空空，因為 in 用人所命令做教示，來教示人。8 按呢恁是放揀上帝的誡命，拘執人的流傳」；14 就閣叫眾人就近伊，給 in 講：「恁攏著聽我，來曉悟。15 見若對人的外面入的袂會染坵人，獨獨對人的內面出的諸個就是染坵人。」21 因為對內面，就是對人的心，出諸個歹念頭、私通、22 偷提、刮人、姦淫、貪心、邪惡、奸詐、好色、歹目、誹謗、驕傲猖狂。23 凡若諸個歹攏是對內面出，也染坵人。」